


**MGA UBAY KAG PAGSULUNDAN
SA PAG-ASAWAHAY SA SULOD SANG PARTIDO**



Malip-ot nga Paathag:

Ang ubay kag pagsulundan sa pag-asawahay sa sulod sang Partido kag kalakip nga paathag sa mga ini ang gin-amyendahan kag liwat nga ginabalhag sang KTKS. Ang mga amyenda ginsulat sang KTKS sandig sa mga dugang sang Ika-10 Plenum sang Komite Sentral.

Ang masunod amo ang mga mayor nga amyenda:

1. Paghatag-tum-ok sa basehan nga mga prinsipyo kag katuyuan sa paglikaw sa paghilawas sang magkahagugma. Kaangot sini, pagsaway, pahanumdom kag edukasyon ang katimbang nga aksyon sa mga kahuyangan sa paglikaw kag indi pagpapanaog sa aksyon pangdisiplina.
2. Sa paghatag sang diborsyo, pagkuha sang rekisito nga pagtilaw sang isa pa ka tuig nga pag-upod sa kaso sang seryoso nga pagpangayo sang diborsyo sang isa sa mag-asawa kag anom ka bulan sa kaso sang pareho nga pagpangayo sang diborsyo sang mag-asawa. Bastante na ang maid-id nga pag-analisa sa kaseryoso sang ginaplastar nga diborsyo, mga basehan sang hingyo kag mga nagligad nga pagpaninguha nga isalbar ang relasyon—agud gilayon nga desisyunan ang diborsyo.
3. Paghatag sa komite nga napatapuan sang magkahagugma ukon indi gani sa paghilisugot sang mga komite nga nagasakop sa ila, sang kinamatarung nga magdesisyon sang pahanugot sa kasal, kabaylo sang daan nga rekisito nga ipasaka kag pagadesisyunan sang gilayon nga mas mataas nga organo.
4. Labi nga pagtuhay sa kinaiya kag kabug-aton sang mga kaso nga ginapapanaogan sang aksyon pangdisiplina agud malikawan ang sobra nga paghusga sa kalalaon sang mga paglapas.
5. Pagtuhay sang mga kaso nga sakop sang aksyon administratibo sang Partido kag mga kaso nga kriminal nga dapat ipasaka kag bistahon sa hukmanan sang banwa.
6. Pagdugang sang hamulag nga seksyon bahin sa pagkilala kag pagtahud sa pagtukod sang relasyon sang magkapareho nga pagkatawo kag pagdapat sini nga wala sang pagpasulabi sang mga ubay, pagsulundan kag prinsipyo sa pagnobyahanay kag pag-asawahay.

Ginasanto ang iban nga bahin sang ubay kag kalakip nga paathag sa natungdan nga mayor nga mga amyenda. Ang iban pa nga amyenda ang kaangot sa labi nga maathag nga presentasyon kag estilo sang pagsulat. Ginabuyok ang mga yunit kag katapo sang Partido nga magpaabot sang ila mga opinyon, obserbasyon kag rekomendasyon sa gin-amyendahan nga mga pagsulundan.

KTKS

Mga Ubay kag Pagsulundan sa Pag-asawahay sa Sulod sang Partido

Sa Partido Komunista sang Pilipinas, nagapangibabaw sa pag-asawahay kag tanan nga bagay kaangot sini ang rebolusyonaryo nga interes sang pumuluyo. Ginapatihan nga may paghigugma (sex love), bagay nga mga basehan personal. Pero bilang mga katapo ukon kandidato nga katapo sang Partido, nagasugot kita nga ipaidalom ini sa paghigugma sa kasahi (class love), buot hambalon, sa pagsalig kag pagsakdag sa rebolusyonaryo nga mithiin sang Partido kag sang proletaryado.

A. Pagluyagay

1. Ang pagpangaluyag kinamatarung sang mga katapu ukon kandidato nga katapu nga wala sang asawa ukon kahagugma. Bisan man, hungod nga ginapaidalom ang kinamatarung nga ini sa pag-ubay kag disiplina sang Partido.
2. Agud makapangaluyag, ang katapu ukon kandidato nga katapu kinahanglan nga magkuha anay sang direkta nga pahanugot sang yunit sang Partido nga nagadumala sa iya hilikuton. Kon ang pagapangaluyagan upod sa lain nga yunit sang Partido, ang yunit sang nagapangaluyag ang magapaabot sa pihak nga yunit kag magapangayo sang pahanugot sa pagpangaluyag basta nagapasugot ang pagapangaluyagan.
3. Kon ang isa ka katapu ukon kandidato nga katapu gusto mangaluyag sa isa ka indi katapu, ginapakamaayo nga may basehan nga ang pagapangaluyagan pwede mangin kandidato nga katapu man lang sa sulod sang anum ka bulan matapos ihatag ang pahanugot.
4. Kon ang isa ka katapu ukon kandidato nga katapu ginapangaluyagan sa sulod ukon gwa sang Partido, iya ipahibalo ini sa yunit nga iya ginapasakupan nga amo ang magahatag sang pahanugot. Kon ang gusto mangaluyag ukon nagapangaluyag indi katapu sang Partido, ginapakamaayo nga may bastante nga basehan nga siya pwede mangin kandidato nga katapu man lang sa sulod sang anum ka bulan matapos ihatag ang pahanugot.
5. Ang katapu ukon kandidato nga katapu indi pagatugutan nga mangaluyag ukon pangaluyagan sang sin-o man nga ginakabig nga traidor ukon masupog nga kontra-rebolusyonaryo ukon indi gani may tuyo nga magpahilayo sa iya sa rebolusyonaryo nga hilikuton.
6. Ang katapu ukon kandidato nga katapu nga nakatalana sa yunit sang Bag-ong Hangaway sang Banwa kag iban pa nga hilikuton nga lubos-panahon indi pagatugutan nga mangaluyag ukon pangaluyagan tubtob nga indi makatapos sang isa ka tuig sa serbisyo.
7. Wala sang pagatugutan nga mangaluyag ukon pangaluyagan sa sobra sa isa sa isa ka panahon. Kon may dungan nga nagpahibalo sa pagpangaluyag, ang pangaluyagan ang magadesisyon kon sin-o ang mauna. Kon may gusto mangaluyag sa isa ka ginapangaluyagan na, pwede ipalab-ot sa

- gusto pangaluyagan kag sa nagapangaluyag ang ini nga intensyon—paagi sa natungdan nga mga organo; pero indi pa siya pwede nga mangaluyag tubtob sa indi pa nagdesisyon ang gusto gusto pangaluyagan.
8. Antes magpakasal, ginapakamaayo nga indi magnubo sa isa ka tuig ang panahon sang pagnobyahanay. Ginakonsiderar kaangot sini ang kadugayon sang pagkilalahay ukon edad sang magkahagugma.
 9. Wala sang pagatugutan nga mangaluyag ukon pangaluyagan sang sin-o man nga indi pa ginakabig sang Partido nga lusaw na ang kasal sa iban.
 10. Dapat likawan ang pagpakighilawas antes makasal. Katuyuan sini nga halungan ang kababainhan batok sa pagpanghimulos kag hatagan sang bastante nga panahon ang paghanda para sa mga responsibilidad sa pagpamilya samtang nagarebolusyon.

B. Kasal

1. Ang kasal seryoso nga bagay nga dapat maayo nga handaan sang mga gusto magpakasal kag sang natungdan nga yunit ukon mga yunit sang Partido.
2. Pareho sang mga rekisito sa pagngaluyag ang mga rekisito agud ihatag sang natungdan nga mga yunit sang Partido ang pahanugot sa pagpakasal.
3. Ang pangabay sa pagpakasal pagatalakayon sang yunit ukon mga yunit sang Partido nga ginapasakupan sang magkahagugma kag paga-isahan kon pagatugutan. Ang seksyon ang pinakamanubo nga organo sang Partido nga pwede maghatag sang pahanugot sa pagpakasal.
4. Matapos ihatag sang natungdan nga nagapamuno nga organo ang pahanugot, magapili ang mga magapakasal sang isa ka kadre nga magakasal halin sa yunit nila ukon sa yunit nga mas mataas. Ang kadre nga magakasal ang magadumala sa seremonya sa kasal, pagsumpa sa kasal kag pirmahanay sang kontrata sa kasal.
5. Kinahanglan ang tatlo ukon labi pa nga saksi ukon isponsor nga pagapilion ukon imbitahon sang pares nga magapakasal agud magtambong sa seremonya sang kasal. Sa mga saksi ukon isponsor, indi dapat magnubo sa duha ang lubos nga katapu sang Partido.
6. Antes ang kasal, magahambalanay ang mga magapakasal, isponsor kag kadre nga magakasal kag diri isaysay sang mga magapakasal ang kasaysayan kag kapuslanan sang ila relasyon, analisahon nila ang isa kag isa kag pagasawayon ang kaugalingon kag ang tagsa-tagsa. Pwede sila pamangkuton sang mga kaatubang nila bahin sa ila relasyon ukon mga bagay nga may kaangot sini, kag pagalaygayan sila bahin sa pagpauswag sang ila relasyon.

7. Sa seremonya sa kasal, igasaad kag igapaathag sang nagakasal ang mga kinamatarung kag obligasyon sang mag-asawa pareho sang masunod:
 - a. Ang katampad sa isa kag isa santo sa katampad sa rebolusyonaryo nga kawsa.
 - b. Ang rebolusyonaryo nga pagpadaku kag pag-edukar sa mga anak; kag
 - k. Ang pagpalapit sang mag-asawa ukon sin-o man sa ila sa mga isponsor sa kasal, mga organo sang Partido ukon nagkasal bahin sa ano man nga problema sang mag-asawa ukon pamilya.
8. Samtang ang ginakasal gina-isa sang pulang bandera sang Partido bilang kapa nga nagaangot sa ila, pagasambiton nila sa pagpamuno sang nagakasal ang masunod nga sumpa nga ara sa Kontrata sa Kasal sa Sulod sang Partido:

“Kami, (sambiton sang kada isa ang ngalan sa paghimakas) hungod sa buot nga nagapakasal bilang mag-asawa sa adlaw nga ini.

“Bilang mga katapu (o kandidato nga katapu) sang Partido, bug-os tagipusuon kami nga nakatana sa pagtuman sa amon nga katungdanan sa rebolusyon kag lubos nga magtinguha agud isulong ini.

“Nagasumpa kami nga tumanon ang mga katungdanan sa isa kag isa kag pagatahuron ang kinamatarung sang isa kag isa sandig sa mga pagsulundan sang Partido bahin sa kasal.

“Wala sang sin-o man sa amon ang pwede magbulag sa amon relasyon mag-asawa sang nga wala sang matarung nga kabangdanan kag wala sang pahanugot sang Partido.

“May kinamatarung kami nga magdangop sa Partido kag magpangayo sang laygay sini san-o man nga may palaligban kami. May kinamatarung man ang kada isa sa amon nga magplastar sang ano man nga pangabay para sa katumanan sang amon kasugot bilang mag-asawa.

“Kami nagasumpa nga wala sang sin-o man sa amon ang mangin sablag sa pangkabilugan nga interes sang rebolusyon kag sang pumuluyo.”
9. Maga-epekto ang kasal matapos pirmahan sang ginakasal, mga isponsor ukon saksi kag sang nagakasal ang kontrata sa kasal.
10. Ginapakamaayo nga ang mga katapu sang Partido nga una nga ginkasal sa gwa sang Partido liwat nga magpakasal sa sulod sang Partido sandig sa seremonya nga nahamtang sa Isip 5 tubtob sa Isip 8 sa ibabaw.

K. Diborsyo

1. Bangud una ginapangayo ang ginpamensar kag seryoso nga paghanda sa kasal, ginatinguha sang Partido nga puggan ang paghabyog sa diborsyo sa paglubad sa mga palaligban sang mag-asawa.

2. Ginahatag ang diborsyo sa isa sa mag-asawa sa tion nga napamatud-an nga tayuyon nga naga-upang sa iya rebolusyonaryo nga hilikuton ukon nangin traidor ukon masupog nga kontra-rebolusyonaryo ang isa pa.
3. Ginahatag ang diborsyo sa tion nga ginapangayo sang isa sa mag-asawa kag may pamatuod nga ang asawa nga gusto nga diborsyohon may kaso sang pagluib sa asawa, pag-angkon sang duha ka asawa (bigamya), kapintas ukon pagbukong sa kabuhi sang asawa.
4. Ginahatag ang diborsyo sa mga kaso nga ang isa sa mag-asawa indi na makatuman sa katungdanan bilang asawa sa sobra sa lima ka tuig, bangud sa pagsablag sang kaaway ukon permanente nga kasablagan pisikal, kon magkolasugot ang mag-asawa. Kon ang kasablagan sa utok kag wala nagaayo, pwede nga ihatag ang diborsyo pagkaligad sang tatlo ka tuig.
5. Ginahatag ang diborsyo sa tion nga ang isa sa mag-asawa hungod nga nagbiya sang duha ka tuig sa iya responsibilidad sa kasal ukon ayhan nadula kag wala sang angot sa lima ka tuig.
6. Ginahatag ang diborsyo sa tion nga ginapamilit sang mag-asawa ukon sang sin-o man sa ila bangud sa mga personal nga indi paghilisugot nga nagbunga sang pagkaguba sang relasyon, kag ang relasyon nangin daku nga pabug-at na sa mag-asawa kag sa mga hilikuton nila sa Partido. Bisan man, kinahanglan ang pinakamaid-id nga pag-analisar sa mga kaso nga subong sini, ang pagseguro nga seryoso gid ang pagpangayo sang diborsyo kag ang mga basehan sini, kag makaligad nga mapamatud-an nga napaslawan ang mga tikang agud tilawan nga luwason ang relasyon.
7. Sa tion nga may diborsyo, pagapat-uron sang Partido nga maayo nga matatap ang mga anak.
8. Kon ang isa sa mag-asawa nga ginhatagan sang diborsyo indi katapu ni kandidato nga katapu sang Partido, tinguhaon nga ipaathag sa iya ang basehan ukon mga basehan sang diborsyo. Sa pag-analisar kag pagbista sang aplikasyon sa diborsyo, dapat kuhaon ang bahin sang asawa nga ara sa gwa sang Partido, basta ginapahanugutan sang kahimtangan sa seguridad.
9. Ang aplikasyon sa diborsyo pagabistahon kag pagadesisyunan sang komite sang tatlo nga pagatugahon sang nagapamuno nga organo nga nagasakop sa mag-asawa, apang ang komite sang tatlo indi pwede magnubo sa lebel sang komite sang Partido sa seksyon. Kon may silot nga kinahanglan nga idapat kaangot sang kaso sa diborsyo, ang komite sang tatlo magahimo sang rekomendasyon bahin diri sa natungdan nga organo sang Partido.

D. Aksyon Pangdisiplina

Ang masunod nga mga malala nga paglapas sa mga pagsulundan nga ini pagadapatan sang nagakaigo nga aksyon pangdisiplina:

1. Ang pagtago sa estado nga may-asawa pagadapatan sang aksyon pangdisiplina nga demosyon sa katungdanan.

2. Ang malala nga pagpamahog kag pagpamahog sa pagpangaluyag pagadapatan sang aksyon pangdisiplina nga halin sa minimum nga suspensyon sa pagka-katapu sang Partido tubtob sa maksimum nga pagpahalin.
3. Ang paggamit sang kalakasan sa pagpangaluyag pagadapatan sang aksyon pangdisiplina nga halin sa minimum nga suspensyon sa pagka-katapu sang Partido tubtob sa sa pagpahalin.
4. Ang pagpangako sang posisyon, paggamit sa posisyon kag pagpakunokuno nga mataas ang posisyon, agud mapasabat ang ginapangaluyagan pagadapatan sang aksyon pangdisiplina nga halin sa minimum nga demosyon sa katungdanan tubtob sa isa ka tuig nga suspensyon sa pagka-katapu sa Partido.
5. Ang pagpangaluyag sa may asawa ukon kahagugma pagadapatan sang aksyon pangdisiplina nga paandam kag paglaygay.
6. Ang mga kaso sang pagpangaluyag nga wala sang pahanugot kon wala pa sa talaksan ang nagapangaluyag ukon ginapangaluyagan kag nagabungga sang mga dalagku nga problema sa seguridad kag sa pulitika pagadapatan sang aksyon pangdisiplina nga paandam kag paglaygay. Ang pagpangaluyag nga wala sang pahanugot kon ara satalaksan ang nagapangaluyag kag ginapangaluyagan indi pagadapatan sang aksyon pangdisiplina pero pagasawayon.
7. Ang pag-angkon sang duha ukon sobra pa nga kahagugma pagadapatan sang aksyon pangdisiplina halin sa minimum nga demosyon sa katungdanan, pagsaylo sang hilikuton tubtob sa suspensyon sa pagka-katapu sa Partido.
8. Ang mga malala nga paglapas sa kasal pareho sang pinakamalala nga pagluib sa asawa, pag-angkon sang duha ka asawa, pagkapintas ukon pagbuko sa kabuhi sang asawa pagadapatan sang aksyon pangdisiplina halin sa minimum nga suspensyon sa pagka-katapu sang Partido tubtob sa sa pagpahalin.

Sa mga kaso nga wala sang pat-ud nga taning ang suspensyon sa pagka-katapu sang Partido, ginatugyan sa natungdan nga mga komite ang pagtalana sini sandig sa pag-analisar sa kabug-aton sang paglapas.

Sa mga kaso nga may kinaiya nga kriminal kag may bastante nga basehan agud iakusar sa hukmanan sang banwa, pagapat-uron nga napapanaog ang nagakadapat nga aksyon pangdisiplina sang Partido kag naathag ang tindog sa Partido antes pormal nga ipasaka ang kaso kriminal sa hukmanan sang banwa.

Ang nagakadapat nga aksyon pangdisiplina sa mga partikular nga kaso pagahusgahan sang natungdan nga mga komite sandig sa pangkabilugan nga mga proseso nga ginatalana sa Konstitusyon sang Partido.

Dapat pat-uron ang maid-id nga pag-analisar sa kaso kag pagbalanse sa mga sirkunstanya nga nagapabug-at kag nagapamag-an sa kaso.

Sa iban pa nga mga kaso sa paglapas sa mga pagsulundan sa pag-asawahay sa sulod sang Partido nga indi nasakop sang paghilera diri, ginatugyan sa natungdan nga mga komite ang pag-atubang sa mga ini.

Ginapangayo nga ipahayag ang mga ini agud maidokumento kag maskop sang istandard nga ubay sa pagdapat sa aksyon pangdisiplina.

E. Pag-aplikar sa Relasyon sang Magkapareho nga Pagkatawo

- 1. Ginakilala kag ginatahud sang Partido ang kinamatarung sa pagpili sang pagkatawo sang indibidwal nga katapu sang Partido.**
- 2. Ang mga basehan nga prinsipyo kag pagsulundan sa pag-asawahay sa sulod sang Partido aplikable sa ila mga kaso.**

**Gin-amyendahan sang:
KTKS**

**Base sa mga dugang sang:
Ika-10 Plenum sang Komite
Sentral**

**Pila Paathag sa mga Pagsulundan
sa Pag-asawahay sa Sulod sang Partido**

1. *Ngaa kinahanglan ang mga pagsulundan sa pag-asawahay sa sulod sang Partido?*

Mga demokratiko nga kinamatarung sang kada katapu sang Partido-kag kada indibidwal sa katilingban - ang kahilwayan sa paghigugma kag ang kinamatarung nga mangin malipayon sa pag-asawahay. Indi dapat upangan ang hilway nga pagpili sang sin-o man sa iya higugmaon kag pakasalan.

Sa pihak nga bahin, batok kita sa anarkismo ukon sa wala sang kontrol nga paghatag-kahilwayan sa gusto sang kada indibidwal. Ang anarkismo sa paghigugma nagabunga sang paglapak sa kinamatarung sang iban, irresponsable nga pagsulod kag pag-gwa sa relasyon, kag halog nga moralidad. Ini kabanggi sa katuyuan naton nga tukuron ang katilingban nga matarung kag progresibo kag sa katungdanan naton nga moldehon ang mga tawo kag pamilya nga proletaryo nga wala untat nga magapakigbato agud maagom ang katuyuan nga ini.

Sa paghigugma, may kahilwayan kag disiplina, mga kinamatarung kag responsibilidad; may bahin nga sa balatyagon kag bahin nga sa prinsipyo. Base sa panan-awan nga ini, naghimo kita sang mga pagsulundan agud maubayan ang tanan nga katapu kag yunit sang Partido.

Ang una nga katuyuan sang aton nga mga pagsulundan ang pag-amlig sa interes sang Partido kag rebolusyon. Ang ikaduha ang pag-amlig sa mga kinamatarung sang kada katapo sang Partido kag iban pa nga pwede maimbolbar. Kag ang ikatatlo ang pagsakdag sa mapagros nga relasyon proletaryo sang mga mag-asawa sa sulod sang Partido.

Ang subong nga mga pagsulundan ang pinal nga bersyon sang borador nga ginbalay sang KT-KS sadtong Abril 1977. Ginbag-o ukon gindugangan ang pila ka bahin sang nasambit nga borador, sandig sa mga suhestyon halin sa rehiyon. Liwat nga gindugangan sang Ika-10 Plenum sang Komite Sentral sandig sa natipon nga manggaran nga inagihan kag gin-amyendaran sang KTKS sandig sa espiritu sang mga dugang sang Ika-10 Plenum sang Komite Sentral.

Ang mga pagsulundan naton nakabase sa mga proletaryo nga prinsipyo sa pag-asawahay kag nagahatag sang mga kongkreto nga polisiya agud maayo nga mapatuman ang mga prinsipyo nga ini. Ginaathag sang aton nga mga pagsulundan ang mga kinamatarung kag katungdanan sang mga kaupod nga nagaluyagay, magkahagugma ukon mag-asawa, kag sang mga kolektiba nga ginapasakupan nila. Hugot nga ginakonsiderar sang mga pagsulundan naton ang mga partikularidad sang kabuhi mag-asawa sa sulod sang Partido samtang kita nagapakig-away pa agud maagaw ang gahum pangpulitika. Bangud diri, mas istrikto sangsa sa pwede nga ipalapnag sa gwa sang Partido ang pila ka pagsulundan naton.

Sa kabilugan husto ang nangin pag-uyat sang Partido sa halambalanon sang pag-asawahay, bisan sadtong wala pa sang istandard nga mga pagsulundan bahin diri. Ginapangibabaw naton ang mga proletaryo nga prinsipyo, gin-amligan naton ang mga kinamatarung sang mga katapu sang Partido, ginsakdag naton ang disiplina, kag nagtinguha kita nga pauswagon ang relasyon mag-asawa

nga mapuslanon sa rebolusyon. Base sa ila mga inagihan, nagboluntad ang mga pangrehiyon nga organisasyon sang Partido sa paghimo kag pagpaluntad sa tagsa nila ka mga pagsulundan.

Bisan man, sa paggwa sang istandard nga mga pagsulundan, ginalauman naton nga malubad ang nabilin nga mga problema kag mas aktibo pa naton nga mapauswag ang relasyon mag-asawa sa sulod sang Partido. Gusto naton nga kuhaon ang ano man nga daku nga kinatuhay sa pila polisiya sang mga rehiyon. Kadungan sini, gusto naton nga tadlungon ang pila ka kaso sang sobra nga pagpahugot kag sobra nag paghalog.

2. Ngaa kinahanglan ang hilikuton edukasyon bahin sa pag-asawahay sa sulod sang Partido?

Sa sulod sang Partido, gusto naton nga mangin matuod nga mapagros kag proletaryo ang relasyon sang mga magkahagugma kag mag-asawa. Nagaluntad ang subong sini nga relasyon kon ini nakabase sa paghigugma-anay, kabanggi sa pagpanghimulos kag pagpamigos, kag labi nga nagapalig-on sa determinasyon sang magkarelasyon nga lubos nga tumanon ang ila mga katungdanan sa Partido kag rebolusyon. Ang proletaryo nga relasyon mag-asawa nagaseguro man sa rebolusyonaryo nga pagpadaku sa mga anak.

Ginalatag sa aton nga mga pagsulundan ang mga kondisyon nga kinahanglan kag ang mga ubay sa pagtukod sang subong sini nga relasyon. Pero madamo nga halambalanon nga wala ginatalakay ukon bastante nga ginapaathag sa aton nga mga pagsulundan. Ang kinahanglanon nga ini dapat pun-an paagi sa kolektibo kag indibidwal nga pagtuon.

Kinahanglan man ang hilikuton edukasyon agud hugot nga mapatuman ang aton nga mga pagsulundan. Kinahanglan nga ipahangop sang husto sa mga katapu sang Partido ang mga prinsipyo nga basehan sang aton nga mga pagsulundan. Sa subong sini, mangin muklat ang pagsunod nila sa mga ini kag mapatingkad ang ila pag-inisyatiba sa pagpahanumdom ukon pagsaway sa iban nga kaupod, kon kinahanglan.

Ang hilikuton edukasyon yabi sa pagpamatok sa mga impluwensya sa sulod sang Partido sang mga ideya nga pyudal kag burgis nahanungod sa paghigugma kag pag-asawahay, nga lapnagon sa katilingban. Madugay nga ginasakdag ang mga sala nga ideya nga ini sang mga nagahari nga sahi, sang relihiyon, kag sang mga daan nga kaugalian. Nagabunga ini sang mga problema sa relasyon mag-asawa kag nagahalit dayon sa organisasyon kag hilikuton pangpulitika sang Partido. Athagon naton sa tanan nga katapu kon ngaa sala ang mga ini kag kon ano ang husto.

Sa nagligad, napabay-an sa madamo nga yunit sang Partido ang hilikuton edukasyon bahin sa halambalanon nga ini. Talalupangdon ang mga kaso sang sobra nga paggamit sa mga regulasyon bisan sa mga kahigayunan nga mas kinahanglan kag mas makapaayo ang pagkumbinse kag ang pagpaathag sa mga prinsipyo. Dapat tadlungon ang subong sini nga ginawi kag hatagan sang natungdan nga atensyon ang hilikuton edukasyon bahin sa pag-asawahay. Likawan lang nga magka-on sang tuman kadaku nga panahon sang mga yunit kag bisan sang mga katapu sang Partido ang pagsugilanon sa mga halambalanon nga ini. Malahalon nga athagon sa mga kaupod ang mga prinsipyo

naton sa pag-asawahay, pero menor ang hilikuton nga ini kon ipaanggid sa mga dalagku nga halambalanon pangpulitika nga ginaatubang sang Partido subong.

3. Para sa magkahagugma ukon mag-asawa sa sulod sang Partido, ano ang husto nga relasyon sang paghigugma (sex love) kag ang pagpakamahal sa kasahi (class love)?

Ang paghigugma ang balatyagon nga natural nga nagatubo sa tunga sang partikular nga lalaki kag babae pag-abot sa husto nga pang-edaron. Ini produkto sang mga kinaiya kag kinahanglanon emosyunal kag pisikal sang tawo. Nagakahuman ang paghigugma base sa pagkagusto sa mga personal nga kinaiya.

Ang pagpakamahal sa kasahi naman ang lubos-tagipusuon nga paghakos kag pagsakdag sa mga rebolusyonaryo nga handum sang proletaryado kag wala untat nga pagpamatok sa pagpanghimulos kag pagpamigos. Ini kabahin sang kamuklatan nga makasahi sang mga proletaryo nga rebolusyonaryo kag makita sa lubos nga pag-alagad sa Partido, rebolusyon, kag pumuluyo.

Sa magkahagugma ukon mag-asawa sa sulod sang Partido, pareho kinahanglan kag indi mahamulag ang paghigugma kag pagpakamahal sa kauri. Kinahanglan ang paghigugma bangud ini ang naga-isa sa duha ka kaupod sa relasyon nga magkahagugma ukon mag-asawa, nga pinasahi sa iban pa nga relasyon nga magkaupod. Kon wala ang paghigugma, wala sang basehan ang relasyon mag-asawa ukon magkahagugma. Kinahanglan naman ang pagpakamahal sa kasahi bangud ini ang marka sang ano man nga malahalon nga ginahimo sang mga proletaryo nga rebolusyonaryo. Ini ang dapat mangibabaw sa tanan nga relasyon nga magkaupod.

Sa pagluyagay kag pag-asawahay sa sulod sang Partido, ang paghigugma gilayon nga ginaimpluwensyahan kag nagatingob sa sa pagpakamahal sa kasahi, halin sa pagpili sang pagahigugmaon tubtob sa pagdala sang pamilya. Ang mga talaksan kag katuyuan nga rebolusyonaryo permi nga makahuluga sa nagustuhan kag ginapangindi-an sang isa ka proletaryo nga rebolusyonaryo; matuod ini bisan sa halambalanon sang paghigugma.

Sa kabilugan, aton ginapaidalum ang paghigugma sa pagpakamahal sa kasahi. Santo sa subong sini nga relasyon sang duha sa pundamental nga panindugan sang mga proletaryo nga rebolusyonaryo: ang pagpaidalom sang personal nga interes sa interes sang pumuluyo.

Naipaidalom ang paghigugma sa pagpakamahal sa kasahi kon:

a. sa pagpili sang higugmaon, ginapangibabaw ang mga talaksan nga rebolusyonaryo samtang wala ginakalipatan ang mga basehan nga lubos nga personal. Indi ini nagakahulugan sang pagtalana sang tuman kataas nga talaksan sa ideolohiya kag pulitika. Ang pinakamalahalon mapat-ud anay nga ang pagapilion aktibo nga magasuporta kag makatimbang sa mga rebolusyonaryo nga hilikuton sang katapu sang Partido nga naimbolbar. Gani ginabuyok naton ang mga katapu sang Partido nga magpili sang higugmaon sa mga kapareho nga katapu ukon malapit nga mangin katapu sang Partido.

b. Sa pagtratar sa isa kag isa, ginapangibabaw sang magkahagugma ukon mag-asawa ang pagsabat sa mga rebolusyonaryo nga

katungdanan sang kada isa, kag ang pagbinuligay agud pauswagon ang rebolusyonaryo nga kamuklatan kag pamatukan ang mga kahuyangan nila.

k. makiprinsipyo ang panindugan bisan sa mga halambalanon nga naimbolber ang kahagugma ukon asawa. Ang relasyon magkahagugma ukon mag-asawa wala ginapabaya-an nga makaupang sa pagbilog sang Partido sang husto nga pag-analisar kag desisyon sa ano man nga halambalanon.

d. ang relasyon nga magkahagugma ukon mag-asawa wala ginapabaya-an nga makasablag sa pagsakdag sa mga polisiya kag sa disiplina sang Partido.

e. ang paghigugmaanay wala ginapabaya-an nga magbunga sang paglapak sa mga kinamatarung sang iban.

g. ang interes sang magkahagugma ukon mag-asawa wala ginapabaya-an nga makahalit sa interes sang rebolusyon kag pumuluyo. Dapat permi nga handa nga isakripisyo ang mga personal nga interes sa tion nga hugot nga ginapangayo ini sang interes sang rebolusyon kag pumuluyo.

4. Ano ang mga sala nga ideya nga makita sa sulod sang Partido bahin sa relasyon sang paghigugma kag pagpakamahal sa kasahi?

Isa ka sala nga ideya ang pagpangibabaw sang paghigugma sa pagpakamahal sa kasahi. Ang kahulugan sini ang pagpanguna sang interes sang relasyon personal sa interes sang pumuluyo. Kon subong sini ang pagpati sang isa ka kaupod, labi niya nga ginahatagan importansya ang makapaayo sa relasyon personal sangsa sa makapaayo sa Partido kag rebolusyon, sa tion nga nagabunggo ang interes sang duha. Kon indi maagapan ang pagpamatok sa makatalagam nga ideya nga ini, pwede pa nga magdangat ini sa padayon nga pagbuhi sa mga katuyuan kag prinsipyo nga rebolusyonaryo.

Nagaluntad ang sala nga ideya nga ini sa relasyon nga magkahagugma ukon mag-asawa sa tion nga direkta nga ginalapas ang mga pagsulundan nga nakahilera sa sabat sa ikatatlo nga pamangkot. Kon ano kalubha ang impluwensya sang ideya nga ini sa isa ka relasyon nga magkahagugma ukon mag-asawa amo man ang pagka-indi proletaryo sang relasyon nga ini.

Ang pagpangibabaw sang paghigugma sa pagpakamahal sa kasahi bunga sang mga indibidwalista nga konsepto bahin sa paghigugma, nga kinaandan nga dala-dala sang mga petiburgis sa kasyudaran kag kaumhan. Ang ubod sang mga konsepto nga ini ang lubos ukon labi nga paghatag importansya sa ano man nga gusto ukon kalipayan sang kaugalingon bisan ini makapalain sa interes sang kadam-an. Kon kaisa, ang mga ini ara sa dagway sang anarkista nga reaksyon sang mga petiburgis sa mga restriksyon sa kahilwayan sa paghigugma nga ginadikta sang mga daan nga kaugalian.

Mabaskog nga nagasulsol man sa pagpangibabaw sang paghigugma sa pagpakamahal sa kasahi ang mga impluwensya sang mga konsepto nga pyudal kag burgis bahin sa pagpamilya. Ginatum-ukan sang mga konsepto nga ini nga ang pangunahon nga responsibilidad sang isa ka may pamilya, luwas sa iya kaugalingon, ara sa iya pamilya.

Sa pihak nga bahin, sala man ang ideya nga bangian nga nagatum-ok sa mga basehan sa ideolohiya kag pulitika kag nagabalewala sa mga basehan nga personal. Bunga naman ang ideya nga ini sang pila ka “wala” nga konsepto bahin sa paghigugma nga nagtuhaw sa sulod sang Partido.

Mahuyang ang relasyon nga magkahagugma kag mag-asawa nga ginatukod sa impluwensya sang ideya nga ini. Matuod nga may mga kaupod nga magkahagugma kag mag-asawa nga sa kadugayon nakapanadlong sa subong sini nga pagpati nila kag nagmadinalag-on nga pauswagon pareho ang ila relasyon sa ideolohiya kag pulitika kag relasyon personal. Pero kinaandan nga nagaagi sila sa mga problema nga dapat tani nalikawan kon sa umpisa pa indi bangian ang pagtan-aw sa mga basehan sang relasyon nga magkahagugma kag mag-asawa sa sulod sang Partido.

Kapin pa, madamo nga kaupod nga magkahagugma kag mag-asawa ang mahapos nga nagbugnaw sa relasyon, nabug-atan sini, kag nagbulagay bangud wala nila napangibabawan ang pagka mahuyang sang relasyon personal nga ginsudlan nila.

Indi lang ang magkahagugma ukon mag-asawa ang apektado sang mga problema nga ginbunga sang sala nga ideya nga ini. Masami lakip nga nagakahalitan ang mga rebolusyonaryo nga hilikuton sang magkahagugma ukon mag-asawa kag nagakaproblema upod ang yunit sang Partido nga ginapasakupan nila.

Isa ka dagway sang sala nga ideya nga ini ang pasibangdan ang mga hilikuton sa Partido agud tabunan ang iresponsable nga pagtratar sa asawa. Ginapangayo naton sa mga kaupod nga mag-asawa ang mga sakripisyo sa relasyon personal kon matuod nga ginapangayo ang mga ini ... (missing) nagakahulugan sang pagkunsinti sa iresponsable nga pagtratar sa asawa. Dapat hatagan sang nagakadapat nga lugar ang pagpauswag sa relasyon personal sang mga kaupod nga mag-asawa. Sa mga kaupod nga may mga mabug-at nga katungdanan, kinahanglan ang maayo nga pagplano sa paggamit sang panahon agud matungdan ini.

Sa pila ka kahigayunan, ang sala nga ideya nga ini ginagamit agud iduso ang kaupod nga babae nga magpakignobyong sa wala niya ginahigugma. Sa subong sini nga kahigayunan, lakip nga ginalapakan ang iya sandigan nga kinamatarong sa hilway nga pagpili sang higugma-on.

5. Ano ang husto nga panan-awan sa kababainhan? Ngaa pundamental nga halambalanon ini sa proletaryo nga relasyon nga magkahagugma ukon mag-asawa?

Ang tanan nga kabahin sa sahi nga ginahimuslan kag ginapigos--- bisan lalaki man ukon babae ginapabudlayan sang sistema nga malakolonyal kag malapyudal. Pero may dugang nga palas-anon ang kababainhan; ginapigos sila sang dominasyon sang kalalakihan sa sulod kag guwa sang pamilya kag sang mga kaugalian kag ideya nga pyudal kag burgis nga nagasakdag sa dominasyon nga ini.

Manubo ang pusisyon sang kababainhan sa subong nga katilingban. Ginapakagamay ang ila ikasarang kag madamo nga sablag sa lubos nga pagpasakop nila sa pag-atubang sa mga dalagku nga halambalanon sa katilingban; lapnagon ang pamensaron nga sila pangkusina kag pangkama lang bisan sa ila asawa.

Ginapanindugan sang Partido nga ang kababainhan isa ka gamhanan nga pwersa nga dapat organisahon kag lubos nga pahulagon para sa rebolusyon. Sila dapat mangin katupong nga katimbang sang kalalakihan sa pagbag-o kag pagpadalagan sang katilingban kag sang pamilya. Indi magadaog ang rebolusyon kon indi malaparan nga pagapukawon, pagaorganisahon kag pahulagon ang kababainhan. Samtang sa daku nga bahin dapat padayon nga magtungod sang espesyal nga papel ang kababainhan sa pagpadaku sang mga anak, ang katungdanan nga ini indi dapat ipasakbat ila lang kag labi pa, dapat aktibo nga papagsikon ang pagtungod nila sa mga hilikuton sa rebolusyon.

Sa subong, ang pinakamalahalon agud lubos nga mapahulag sa rebolusyon ang kababainhan amo ang pagpataas sa ila kamuklatan pangpulitika, ang pag-organisa sa ila, kag ang pagsakdag sa mga demokratiko nga kinamatarung nila sa sulod kag gwa sang pamilya. Dapat pamatukan ang mga ideya nga nagapakanubo sa kababainhan kag ang mga kaugalian nga nagadingot sa ila sang kinamatarung kag pagkatawo nga magpasakop sa mga importante nga halambalanon sa sulod kag gwa sang balay. Dapat man nga pataason ang kamuklatan pangpulitika sang kababainhan agud mapukaw ang ila interes sa mga halambalanon pangkatilingban, mapauswag ang ila ikasarang nga magpasakop sa rebolusyon, kag mabuyok sila nga iduso ang ila mga kinamatarung. Dapat aktibo nga pasakupon sila sa mga pangkabilugan nga organisasyon kag pagatukuron ang mga espesyal nga organisasyon nga magahatag sang pinasahi nga igtalupangod sa pagsulong sa rebolusyonaryo nga kahublagan sang kababainhan.

Sa pihak nga bahin, ginapamatukan naton ang sobra nga pagpatampok sa halambalanon sang pagpahilway sang kababainhan kag ang paghamulag sini sa pangkabilugan nga halambalanon sang pagpahilway sa bilog nga pungsod kag sa mga sahi nga ginahimuslan. Ginapamatukan naton ang “seksista” nga pagdala sa kahublagan sang kababainhan, nga nagapakalulong sa “gyera sang lalaki kag babaye” kag nagakalipatan ang mas mga dalagku kag mas mga malahalon nga paghimakas nga pungsudnon kag makisahi. Ang pagsakdag sa mga demokratiko nga kinamatarung sang kababainhan kag ang pagpamatok sa mga pyudal kag burgis nga panan-awan sa ila dapat magserbi sa lubos nga pagpahulag sa ila sa rebolusyon kag sa pagbilog sang mga sahi nga ginahimuslan kag pigos agud matutok ang pinakamabaskog nga bunal sa mga kaaway sang pungsod kag mga kaaway sa sahi. Kaangot sini, sa pagsulong sang kahublagan sang kababainhan, dapat likawan ang pagpadaku sa halambalanon nga pareho sang partidahay sa mga hilikuton-pangbalay nga bisan maremedyuhan sa subong nga praktika sang mga katapu sang Partido kag mga abanse nga seksyon sang kahublagan masa, indi pa lubos nga malubad kag indi pa mabag-o sa pangabuhi sang malapad nga masa, tubtob wala nagakatabo ang mga radikal nga pagbag-o sa mga relasyon sa produksyon kag lebel sang pag-uswag sang mga pwersa sa produksyon. Ang kahublagan sang kababainhan dapat hugot nga itingub sa bilog nga kahublagan pungsudnon-demokratiko. Kag ang lubos nga demokratisasyon sang pamilya kag ang lubos nga paghilway sang kababainhan sa mga restriksyon sang hilikuton-pangbalay nakasandig sa kadalag-an sang rebolusyon nga sosyalista.

Espesyal sa pagtukod sang proletaryo nga relasyon nga magkahagugma kag mag-asawa ang husto kag proletaryo nga panan-awan sa kababainhan. Kon mabaskog ukon nagapangibabaw sa relasyon ang pyudal kag burgis nga mga panan-awan sa kababainhan,

indi matukod ang relasyon nga nakasandig sa pagrespetuhanay kag nagapauswag sa rebolusyonaryo nga kamuklatan kag praktika sang kada isa sa magkapares. Tigaylo, ang magaluntad amo ang pagbalewala sa mga kinamatarung sang babaye, ang pagsunud-sunuran niya sa lalaki, kag ang pagpugong sa lubos nga pagpasakop niya sa mga hilikuton sa rebolusyon.

Base sa panan-awan sang Partido sa kababainhan, ginahatagan naton sang partikular nga igtalupangod ang pagpapagsik sa rebolusyonaryo nga kahublagan sang kababainhan. Ginasakdag naton ang alalangay nga kinamatarung sang mga lalaki kag babae sa sulod kag gwa sang Partido. Sa sulod sang relasyon mag-asawa, ginaseguro naton nga mapagros nga nagaluntad ang demokrasya kag ang pagbinuligay sa mga hilikuton kag paglubad sa mga problema. Ginasakdag naton ang institusyon sa kasal; isa ka katuyuan sini ang pagpangapin sa kababainhan batok sa pagpanghimulos sang kalalakihan. Ginasakdag naton ang pagplano sang pagbata agud mahatagan sang mas daku nga kahigayunan sa pagpasakop sa mga hilikuton nga rebolusyonaryo ang mga babaye nga may-asawa. Ginaamligan naton ang kinamatarung sang mga babaye nga hilway nga magpili sa ila higugma-on kag magbalibad sa pagpangaluyag sang indi nila gusto. Ginakilala man naton ang kinamatarung sang mga kaupod nga babaye nga mag-inisyatiba sa pagpangaluyag.

6. Ngaa antes magpangaluyag ukon mapangaluyagan ang isa ka katapu sang Partido, kinahanglan ang pahanugot sang yunit sang Partido nga ginapasakupan niya?

Ang magpangaluyag ukon mapangaluyagan kinamatarung sang sin-o man nga katapu sang Partido nga wala sang kahagugma ukon asawa. Bisan man, kinahanglan ang pahanugot sang yunit nga ginapasakupan sang imbolbado nga katapu sang partido.

Kinahanglan ini agud:

a. Maseguro nga ara sa pusisyon ang nagapangaluyag kag pagapangaluyagan kag ginaamligan ang mga kinamatarung sang tanan nga imbolbado. Ginaseguro nga wala sang iban nga malalapastangan ang kinamatarung kon igahatag ang ginapangayo nga pahanugot. Ginabalanse man sang Partido ang kinamatarung sang gusto mangaluyag nga ipahayag ang iya paghigugma kag ang kinamatarung sang luyag pangaluyagan nga batunon ukon balibaran ini.

b. Mahatagan sang kinahanglan nga oryentasyon kag ubay ang mga imbolbado.

k. Makonsiderar ang mga kinahanglanon sa seguridad kag sa mga hilikuton sa pagtalana sang pamaagi sang angtanay sang magaluyagay.

Idumili ang pahanugot kon nasakop ang magapangaluyag ukon pagapangaluyagan sang mga maathag nga pagdumili nga ara sa aton nga mga pagsulundan. Ang pagdumili nga ini pwede bangud sa:

a. napamatud-an nga kontra-rebolusyonaryo ukon traidor sa rebolusyon ang magapangaluyag ukon pagapangaluyagan.

b. ang magapangaluyag ukon pagapangaluyagan laban-laban ukon napamatud-an nga gusto ipahilayo sa rebolusyon ang katapu sang Partido; kag

k. may kahagugma ukon asawa na ang magapangaluyag ukon pagapangaluyagan.

Pwede temporaryo nga idingot ang pahanugot kon ginapangaluyagan na sang iban ang gusto nga pangaluyagan. Ang katuyuan sini amo ang paglikaw sa mga indi paghangpanay nga pwede ibunga sang magkaribal sa paghigugma. Sa mga kaso nga subong sini, pagapat-uron sang mga natungdan nga yunit sang Partido nga husto nga nabalanse ang kinamatarung sang kada nagapangaluyag kag sang ginapangaluyagan. Dapat hatagan sang rasonable nga panahon ang una nga nagapangaluyag nga ipahayag ang iya paghigugma kag maghimo sang mga tikang agud mabaton ini. Samtang, indi dapat pabay-an nga tuman ka kadugay sang paghulat sang iban pa nga gusto mangaluyag. Kag dapat ikonsiderar permi ang kagustuhan sang ginapangaluyagan.

Pwede man nga indi gilayon ihatag ang pahanugot kon ang gusto mangaluyag ukon pangaluyagan may mga dalagku nga problema sa iya hilikuton sa Partido kag ginatantya nga ang pagpangaluyag indi makabulig sa gilayon nga paglubad sa mga problema.

Para sa mga katapu nga ara sa mga yunit sang hangaway sang banwa ukon iban nga lubos panahon nga nga hilikuton, may maathag nga probisyon sa kalawigon sang serbisyo nga kinahanglan nga matapos antes makapangaluyag ukon mapangaluyagan. May subong sini nga probisyon para sa una nga tuig makonsentrar ang atensyon kag panahon sang mga katapu sang Partido sa pagkabesar sa mga hilikuton kag mga ginapangayo sang bag-o nga katungdanan.

Sa basehan, ang isa ka kaupod nga ginbaton bilang katapu sang Partido handa na nga mangaluyag kag mapangaluyagan. Pero kon tuman ka bata pa ang katapu sang Partido kag bag-o nga rekrut pa siya, maayo man nga buyukon siya nga ipaiway anay ang pagpangaluyag. Mas maayo kon hulaton niya ang pagtuntong sa 21 tuig nga pang-edaron kag bisan man lang isa ka tuig sa pagka- katapu, antes siya magpangaluyag. Sa subong sini, makakonsentrar siya sa pagpaayo sang iya ikasarang sa pagtuman sa mga katungdanan sa sulod sang Partido. Kon sa pihak sang pagbuyok desidido gid nga mangaluyag ang katapu sang Partido, indi pwede idingot ang pahanugot.

Luwas sa mga kaso nga maathag nga ginbawal sa aton nga mga pagsulundan, sa kabilugan dapat mangin maalwan sa kahilwayan sang mga katapu sang Partido sa pagpangaluyag. Indi ipaagi sa regulasyon ang pagsaway sa tuman katemprano nga pagpangaluyag sang mga bag-o nga rekrut sa Partido. Gamiton ang pagbuyok, ang hilikuton edukasyon kag ang pagpatingkad sang interes sang mga bag-o nga rekrut sa mga hilikuton sa Partido.

7. Antes ang kasal, ngaa kinahanglan ang bastante nga panahon sa pagka- magkahagugma?

Ginasaad sa aton nga mga pagsulundan nga ang kasal seryoso nga bagay nga dapat maayo nga handaan sang mga gusto magpakasal kag sang natungdan nga yunit ukon mga yunit sang Partido. Gani indi dapat magpadasu-daso kag indi dapat pakagamayon ang pagsulod diri. Gani antes ang kasal, kinahanglan ang bastante nga panahon sa pagka magkahagugma.

Sa panahon nga ini ginahimo ang mga paghanda sa pag-asawahay. Ginaseguro sang magkahagugma kon matuod nga desidido sila sa relasyon kag kon desidido labi nila nga ginapalig-on ang relasyon. Ginapadalom nila ang mga nahibal-an sa kinaiya sang isa kag isa, ginakabesar nila ang maayo nga pagtratar sa isa kag isa, ginapauswag nila ang ila paghangpanay sa lain-lain nga halambalanon kag bagay nga may kaangtanan sa ila relasyon kag mga hilikuton sa Partido, kag ginapabaskog nila ang pagtamdanay nga nakabase sa pagrespetuhanay, pagbinuligay kag pagsaway kag pagsaway sa kaugalingon.

Ginatun-an na sang magkahagugma, sa panahon nga ini, ang mga prinsipyo sang proletaryo nga relasyon mag-asawa kag nagahanda na sila sa mga responsibilidad kag kinahanglanon sang pagpamilya. Nagaplano kag ginaumpisahan na nila ang mga kongkreto nga tikang agud masabat ang bag-o nga kahimtangan, mga bag-o nga hilikuton kag mga ginalauman nga kinahanglanon sang kabuhi may-asawa sa sulod sang Partido.

Magabulig sa paghanda sang magkasintahan ang yunit ukon mga yunit sang Partido nga ginapasakupan nila. Ang magkahagugma pagahatagan sang oryentasyon sa pagpauswag sang relasyon kag sa mga prinsipyo sang proletaryo nga relasyon mag-asawa. Pagaubayankag pagabuligan sila sa pag-atubang sa mga problema nga ginaatubang sang relasyon. Kon kinahanglan kag ginatugot sang kahimtangan, ginahanda ang pagbag-o sang lugar kag hilikuton nga pagatalanaan sang magkahagugma agud magkaupod sila sa tion nga nakasal na.

Sa panahon nga magkahagugma, pwede man nga mapamatud-an sang magkapares nga na indi bastante ang basehan sang ila relasyon. Kon subong sini, mautod ang relasyon nga mas gamay ang kumplikasyon.

Sa aton nga mga pagsulundan, ginapakamaayo nga indi magnubo sa isa ka tuig ang pagluyagay kag pagka-magkahagugma antes tugutan ang kasal. Kalakip nga ikonsiderar diri ang mga magkahagugma nga may edad na ukon madugay na magkakilala.

8. Ngaa ginasakdag naton ang institusyon sa kasal?

Ang esensya sang kasal amo ang pagkasugot sang isa ka lalaki kag babaye nga mangin mag-asawa sa sulod sang relasyon nga monogamo kag ang pagkasugot nga ini pormal nga ginakilala sang katilingban paagi sa basbas sang estado.

Ang pyudal kag burgis nga kasal pormal nga nagakilala man sa kinaiya nga monogamo sang relasyon mag-asawa. Pero kadungan sang subong sini nga pagkilala ginapahanugutan sang sistema nga pyudal kag burgis ang prostitusyon, hayag man ukon tago.

Gani kinaandan nga sa pyudal kag burgis nga kasal, ang monogamya para sa babae lang. Samtang sa proletaryado nga kasal, hugot nga ginapatuman ang monogamo nga relasyon pareho para sa lalaki kag babaye.

Labaw pa, ang proletaryo nga kasal nakabase sa paghigugma kag alalangay nga kinamatarung sang lalaki kag babaye samtang ang pyudal kag burgis nga kasal nakabase sa dominasyon sang lalaki sa babaye kag masami nga ginapangibabawan sang mga konsiderasyon

nga kabanggi sa kahilwayan sa paghigugma pareho sang pagdikta sang ginikanan, pagpamilit sa babaye kag paglagas sa manggad ukon posisyon sa katilingban.

Ginasakdag naton ang proletaryo nga kasal batok sa pyudal kag burgis nga kasal. Ginasakdag man naton ini batok sa anarkismo sa paghigugma.

Kinahanglan ang institusyon sa kasal agud amligan ang interes sang mga babae batok sa paghimulos sang mga lalaki. Ang responsibilidad sa kasal indi lang responsibilidad sa asawa kundi sa katilingban man. Kinahanglan man ang institusyon sa kasal agud maathag nga matalana ang dulunan sang pagpakigrelasyon sang iban sa mga tawo nga may-asawa na. Sa pagsakdag sa institusyon nga ini, ginasakdag man naton ang responsable nga pagtratar sa relasyon mag-asawa kag ginapamatukan naton ang pagsulod ukon pag-utod sa relasyon mag-asawa base sa padasu-daso nga kabangdanan.

Sa subong, ginakilala naton ang kontrata sa kasal nga ginsudlan sa gwa sang Partido. Bisan man, ginabag-o naton ang oryentasyon sang relasyon sang mga kaupod nga ginkasal sa gwa sang Partido.

Sandig sa pagsakdag naton sa institusyon sa kasal, ginabawal naton ang pagpakighilawas sang magkahagugma antes ang kasal. Ang pagkunsinti sa pagpakighilawas antes ang kasal nagasulsol sa halog nga moralidad nga nagapaluya sa rebolusyonaryo nga espiritu sang mga katapu sang Partido, nagadulot sang mga problema sa sulod sang organisasyon, kag makaguluba sa prestihiyo sang Partido. Kabanggi man ini sa seryoso kag responsable nga pagsulod sa relasyon mag-asawa.

Hugot nga ginabawal man naton ang pagpangaluyag sang mga may asawa ukon sa mga may asawa na, ang pag-angkon sang duha ka asawa, ang pagpakighilawas sa indi asawa.

9. Ano ang mga katungdanan sang mga yunit sang Partido sa pagpauswag sang relasyon sang mga kaupod nga mag-asawa?

Luwas sa pagtinguha sang mag-asawa nga palig-unon ang pundasyon sang ila relasyon, kinahanglan ang bulig sang mga yunit sang Partido. Bisan man, sa pagbulig sang mga yunit sang Partido, likawan ang sobra nga pagpasilabot sa mga tuman kapersonal nga bahin sang relasyon sang mag-asawa.

Dapat ipahangop sang yunit sang Partido sa mag-asawa ang alalangay nga kinamatarung sang isa kag isa nga kinahanglan nila nga respetuhon. Ang iban nga kaupod, labina atong mga madugay na nga may-asawa, dapat magpaambit sang ila inagihan sa pag-asawahay. Katungdanan sang mga yunit sang Partido nga hatagan sang edukasyon sa seks kag pagplano sang pamilya ang mga kaupod nga igakasal ukon mag-asawa na. Pwede ini nga himuon sa mga pagsugilanon nga indi pormal. Ang mga kaupod nga babaye pwede maglaygay sa iban nga kaupod nga babaye; subong man ang mga kaupod nga lalaki. Indi dapat maghuya-huya kag dapat kuhaon ang malisya sa pagsugilanon bahin diri.

Katungdanan sang mga yunit sang Partido nga sawayon ang mag-asawa sa ila mga kasaypanan kag kakulangan sa pagdala sang relasyon, samtang ginapatingkad ang ila mga kinaiya nga positibo.

Magabulig ang Partido sa mag-asawa, lakip mga anak nila, nga aregluhon ang ila pamilya agud matungdan nila sang maayo ang mga rebolusyonaryo nga katungdanan. Ang bulig igahatag sang Partido paagi sa yunit ukon mga yunit nga ginapasakupan sang mag-asawa.

Sa mga kaso nga indi maasikaso sang mga ginikanan ang mga anak nga nagasalig pa sa ila, pagabuligan sang Partido ang natungdan nga mga ginikanan nga ipaatipan ang bata sa mga paryente nga indi pa muklat, tinguhaon nga pamuklaton sila indi lang para sa ila indibidwal nga pag-uswag kundi para man sa husto nga pagpadaku sa bata.

Pangkabilugan nga polisiya naton ang pagdestino sa mag-asawa sa isa lang ukon magkalapit nga yunit sang Partido agud makapangabuhi sila bilang mag-asawa.

10. Ano ang papel sang mga saksi ukon isponsor sa kasal?

Ginatalana sang aton nga mga pagsulundan nga kinahanglan ang tatlo ukon kapin pa nga saksi ukon isponsor, luwas sa pahanugot sang natungdan nga yunit sang Partido, agud mangin balido ang kasal.

Katungdanan sang mga saksi ukon isponsor nga ipaambit sa mga ginakasal ang ila nahibal-an kag inagihan bahin sa pag-asawahay kag pagpamilya sa sulod sang Partido. Magahatag sila sang mga laygay kag suhestyon sa ginakasal.

Pagkatapos sang kasal, dapat tinguhaon sang mga saksi ukon isponsor nga kumustahon sa pana-panahon ang kahimtangan sang mag-asawa kag pamilya nila. Pwede sila nga pangayuan sang bulig sang mag-asawa agud malubad ang mga problema nga nagatuhaw sa relasyon.

Ang dapat pilion nga mga saksi ukon isponsor atong may manggaranon sang inagihan sa rebolusyon kag relasyon mag-asawa. Ini ang kabangdanan kon ngaa ginatalana sang aton nga mga pagsulundan nga kinahanglan nga lubos nga katapu bisan man lang ang duha sa mga saksi ukon isponsor.

11. Ano ang mga katungdanan sang mga kaupod nga mag-asawa?

Katungdanan sang mag-asawa nga iplastar sa yunit ukon mga yunit sang Partido nga ginapasakupan nila ang ano man nga problema sa relasyon ukon sa kaugalingon nga may kaugnayan sa kalig-unon sang ila relasyon ukon makaapekto sa rebolusyonaryo nga hilikuton nila. Upod sa ipaabot nila sa kolektibo ang ano man nga plano nga mag-angkon sang anak agud mahandaan ini sang yunit sang Partido nga ginapasakupan nila.

Pagagamiton sang mag-asawa ang pagkumbinse kag pagsaway kag pagsaway sa kaugalingon agud tadlungon ang kasaypanan kag kahuyangan nila bilang mga katapu sang Partido kag bilang mag-asawa. Maayo kon sa pana-panahon nagasuma ang mag-asawa sang mga inagihan sa relasyon agud hugot ang paghiliusa nila sa pag-atubang sa mga palaligban kag halambalanon nga may kahilabtan sa ila relasyon.

Dapat magpangabuhi sang simple kag makinot, kag maglikaw sa luho ang tanan nga mag-asawa sa sulod sang Partido. Kon nagatrabaho ang mag-asawa ukon isa sa ila, ukon nagabaton sila sang regular nga sustento halin sa mga paryente, igahatag nila sa Partido ang kita nga

sobra sa kinahanglan sa padayon kag epektibo nga pagtungod nila sa ila mga katungdanan.

Ang mag-asawa sa sulod sang Partido dapat mag-inisyatiba nga ipaambit ang ila kahamungaya sa pangabuhi kag mga inagihan sa sin-o man nga kaupod nga mag-asawa nga malab-ot nila kag nagaatubang sa kaimulon.

Tatapon sang mag-asawa ang rebolusyonaryo nga edukasyon sang anak nila kag magtinguha sila nga tukuron ang isa ka pamilya nga Komunista. Igatanom nila sa pamensaron sang ila mga anak ang pagpakamahal sa rebolusyon kag sa masa, kag ang espiritu sang simple kag makinot nga pangabuhi.

Dapat magplano sang pamilya ang mag-asawa. Ginapakamaayo naton ang gamay lang nga anak kag pagpanganak nga may pila nga tuig nga lang-at. Ang katuyuan sini amo ang paghatag sa kaupod nga babaye sang pinakadaku nga kahigayunan nga pwede agud lubos nga makapasakop sa mga rebolusyonaryo nga hilikuton. Kon naplanuhan ang pagpanganak, mas maayo man nga mahandaan ang mga kinahanglanon sa pagpadaku sa bata. Sa kabilugan, ang madamo nga anak kag masami nga pagpanganak mangin pabug-at sa kaupod nga mag-asawa, sa ila mga rebolusyonaryo nga hilikuton, kag sa mga yunit sang Partido nga ginapasakupan nila.

12. Ano ang aton pagtan-aw sa diborsyo?

Ang diborsyo amo ang paglusaw sa relasyon mag-asawa. Nagapati kita nga dapat ipahanugot ang diborsyo sa tion nga wala na basehan ang pagpadayon sang relasyon mag-asawa bangud sa mga konsiderasyon pangpulitika, pisikal, mental ukon emosyonal. Indi dapat piliton nga magpadayon sa ila relasyon ang mag-asawa kon ini nagahalit na sa sin-o man sa ila kag sa rebolusyon.

Bisan man, bangud ginatinguha naton nga pat-uron ang malig-on nga pundasyon sang relasyon antes tugutan ang pagpakasal kag padayon nga ginapalig-on naton ang pundasyon nga ini pagkatapos sang kasal, tubtob sa mahimo ginapunggan naton ang pagwaslik sa diborsyo agud lubaron ang mga problema sang mag-asawa, labina sang mga may-anak.

Ang pagkilala sa kinamatarung sa diborsyo duna nga bahin sang pagkilala sa demokratiko nga kinamatarung sa hilway nga pagpili sa higugmaon. Kon tigaylo nga makahatag sang kaayuhan nga mental kag emosyonal kag makapapagsik sang paghulag sa rebolusyon, ang relasyon mag-asawa nangin daku nga pabug-at na sa sin-o man sa mag-asawa kag sa mga hilikuton nila sa rebolusyon, matarung lang nga kilalahon ang kinamatarung nga makagwa sa subong sini nga relasyon. Indi dapat kabigon ang kasal bilang isa ka kontrata nga indi bisan san-o mapalagyuhan basta nasudlan na, bisan supak na sa buot kag nagahalit na ang pagpadayon sang epektibidad sini. Sa pihak nga bahin, ginapalig-on naton ang institusyon sa kasal kag hugot nga ginadumilian naton ang pagsulod kag paggwa diri nga base lang sa padasu-daso nga kabangdanan. Dapat pat-uron nga ang kinamatarung sa diborsyo wala ginakasangkapan para sa simple nga pagpalagyo sa mga responsibilidad sa relasyon kag agud hatagan ang kapritsoso nga pagtan-aw kag pagdala sa pag-asawahay.

Kinahanglan pareho ang pagkilala sa kinamatarung sa diborsyo kag ang mahalong nga pag-uyat diri. Ara kita sa tunga sang tuman kasingki

nga inaway kag bangud diri may mga dislokasyon kag tuman kadamo nga pagtilaw sa relasyon sang mag-asawa, labina sa sulod sang Partido. Gani labaw sa tanan ginapangayo naton ang dugang nga paghanda sa pag-asawahay sulod sang Partido. Pero kon sa pihak sang mga ini kag bangud sa mga indi maagwantahan nga epekto sang tuman kasingki nga inaway maguba ang partikular nga mga relasyon mag-asawa kag kinahanglan nga pormal nga tunawon ini para sa pagkahamtang sang buot sang mga imbolbado, dapat kilalahon ang kinamatarung nila sa diborsyo. Sa pihak nga bahin, bangud man sa mga indi normal nga kahimtangan sang relasyon sang mga mag-asawa sa sulod sang Partido, dapat indi mangin padasu-daso sa pagwaslik sa diborsyo kag tilawan ang lain-lain nga pamaagi sang pagsalbar sa relasyon antes tunawon ini.

Ginaathag sa aton nga mga pagsulundan ang mga basehan sa paghatag sang diborsyo, subong man ang proseso sang pagbista kag pagdesisyon sini. Kinahanglan nga pat-uron nga indi arbitraryo ang pagdesisyon sa mga aplikasyon sa diborsyo. Dapat maid-id nga sayasaton ang mga basehan sang pagpangayo sang diborsyo, pamatian sang maayo ang lain-lain nga bahin, pabay-an nga hilway nga magpaathag ang mga imbolbado, kag tubtob sa masarangan iatubang sila samtang ginabista kag sa tion nga ginadesisyonan nga ang aplikasyon sa diborsyo.

Kon magdiborsyo sa sulod sang Partido kag nagapabilin ang paghiliusa sa pulitika sang daan nga mag-asawa, dapat ipadayon nila ang maayo nga pagtamdanan bilang magkaupod. Likawan ang pagpangsamad sa isa kag isa, bisan patago man ukon hayag, labina sa atubang sang mga anak.

Kon may anak, alalangay ang mga kinamatarung kag katungdanan sang daan nga mag-asawa nga magsubaybay bilang ginikanan sa pagpadaku sa anak. Dapat sila nga magbuligay sa husto nga pagpadaku sa bata kag sa paglubad sa mga problema nga kaangot sini. Pagapat-uron sang yunit sang Partido nga maayo nga ginatatap ang mga anak sang mga kaupod nga nagdiborsyo.

13. Ngaa nagapanindugan ang Partido sa patahud kag pagkilala sa kinamatarung sa pagpili sa pagkatawo sang indibidwal nga katapu sang Partido?

Batok ang Partido sa ano man nga sahi sang diskriminasyon, pagpamigos kag pagpanghimulos nga nagaluntad sa katilingban. Kabahin diri ang pagpamatok sa diskriminasyon nga nakabase sa pinili nga pagkatawo, sa pagdingot sang mga kinamatarung kag oportunidad sandig sa pinili nga pagkatawo. Nakabase ang pagpatapo sa Partido sa pagkilala kag pagsakdag sa MLKMZ bilang ideolohiya sang proletaryado, sa konstitusyon sang Partido Komunista sang Pilipinas kag sa kahandaan nga magrebolusyon. Wala sang kabangdanan agud ang isa ka indibidwal nga nagasabat sa subong sini nga mga rekisito balibaran sang Partido bangud lamang nga may ara siya sang lain nga pinili nga pagkatawo.

Bisan man, ang mga prinsipyo kag pagsulundan sang Partido ang sandigan nga ubay sa personal nga kabuhi sang mga Komunista. Gani nagakadapat lang nga iayon sang sin-o man nga katapu sang Partido nga may lain nga ginpili nga pagkatawo, pareho man sang iban pa nga katapu sang Partido, ang kondukta sang iya personal nga mga relasyon sandig sa mga ini.

Dapat muklat nga pamatukan ang mga sektaryo nga panan-awan kag aktitud, ang prehudisyal nga pagtratar kag indi maayo nga pagpamensar sa pagkatawo sang mga indibidwal nga may tuhay nga pinili nga pagkatawo.

14. Pila ka obserbasyon sa mga aksyon pangdisiplina sa paglapas sa mga pagsulundan:

Sa pagsakdag sa aton nga mga pagsulundan kag prinsipyo bahin sa pagpangaluyag kag pag-asawahay, pareho nga kinahanglan ang regulasyon kag edukasyon. Indi nga puro puro regulasyon lang bangud gusto naton nga mangin boluntaryo kag muklat ang pagsunod sang mga kaupod sa aton nga mga pagsulundan. Indi man pwede ang puro edukasyon lang bangud kinahanglan maathag nga italana ang mga kinamatarung kag katungdanan sang kada isa, kag malakipan ang aton nga mga prinsipyo sang awtoridad sang organisasyon nga dapat sundon sang tanan nga katapu.

Sa pagtratar sa mga paglapas sa aton nga mga pagsulundan, kinahanglan nga balansehon ang disiplina kag indibidwal nga kahilwayan, kag ang kalig-unon sa prinsipyo kag paghangup. Dapat likawan ang sobra nga pagpahugot kag ang sobra nga paghalog, kag pangibabawon ang espiritu sang pagbulig sa mga kaupod nga nagsayup.

Ang sobra nga pagpahugot kinaandan nga ginabunga sang pagpati nga kinahanglan ini agud mapunggan ang mga paglapas sa mga pagsulundan. Kadungan sini ang sobra nga pagbase sa mga regulasyon kag ang kakulangan sa hilikuton edukasyon. Tigaylo nga makabulig sa pagpabakod sa organisasyon, ang sobra pagpahugot nagabunga sang indi mapagros nga panan-awan, pareho sang paglikom sa Partido, kag makaguba sa pagsalig sang mga katapu sa masangkad nga paghangup sang organisasyon.

Liberalismo naman ang kinaiya sang sobra nga paghalog. Kinahanglan nga aktibo nga pangapinan naton ang aton nga mga prinsipyo kag sandig diri disiplinahan ang mga kaupod nga nagalampas sa nagakabagay. Kon indi, magamuhan ang mga kaupod sa pagkilala sa sala kag husto kag mangin halog ang aton nga organisasyon.

Ang pangunahon nga basehan sang aksyon pangdisiplina am ang aktwal nga kalala sang paglaas. Samtang lubos nga ginkonsiderar ang mga sirkunstansya nga nagapamag-an kag nagapabug-at, likawan nga ang mga ini ang mangin desaysibo sa pagtalana sang aksyong pangdisiplina. Kon subong sini, ang mga paglapas nga pareho ang kinaiya kag kalala ang magkapareho, sa sandigan, ang pagabatunon nga aksyon pangdisiplina. Magaangkon lang sang kinatuhay ang mga ini depende sa mga sirkunstansya nga nagapabug-at kag nagapamag-an.

Sandig sa pagkamaalwan sa kahilwayan sang mga katapu sang Partido sa pagpaathag, luwas sa mga mabug-at nga kaso nga direkta nga ginabawal sang aton nga mga pagsulundan, dapat likawan ang istrikto nga pagtratar sa mga kaso sang pagpangaluyag nga wala sang pahanugot. Masami, ang subong sini nga kaso matratar sang husto bisan wala sang aksyon pangdisiplina.

Sa mga kaso sang pagpakighilawas sang magkahagugma antes ang kasal, amligan ang interes sang kaupod nga babae. Kon may bastante

nga basehan kag kahandaan an mga imbolbado, bisan wala pa sa taning, mas maayo nga kaslon ang magkahagugma. Kinahanglan ini labina sa tion nga nagbunga ang pagpakighilawas.

Dapat buligan nga makalikaw sa pagpakighilawas ang mga magkahagugma antes ang kasal. Kinahanglan man ang hilikuton edukasyon bahin sa kasal kag pag-asawahay agud malikawan ang mga kaso nga ini.

Wala ginadapatan sang aksyon pangdisiplina ang mga magkahagugma nga nagpakighilawas antes ang kasal labi pa kon seryoso sa pagtinguha sa ila relasyon ang magkahagugma. Bisan man, dapat sila pahanumdumon sa mga implikasyon sini labina kon indi pa handa nga magpakasal.

Matalupangdan sa pila nga ka bahin sang organisasyon sang Partido nga ang mga pagsobra nga natabo sa nagligad nakasablag sa husto nga pag-uyat sa mga aksyon pangdisiplina sa mga kaso sa pagpangaluyag kag pag-asawahay. Dapat sumahon ang mga nagligad nga inagihan kag athagon sa organisasyon ang husto kag sala. Sa subong sini, maayo nga makatuon kita sa mga nagligad nga inagihan, madasig nga matadlong ang mga kasaypanan, kag mapauswag ang pagtratar sa mga halambalanon nga ini, tigaylo nga mangin bagahe sa pagpatuman sa husto nga polisiya ang mga nagligad nga kasaypanan.

Base sa subong nga mga polisiya kag pagsulundan sa pagdapat sang aksyon pangdisiplina, dapat rebyuhon ang mga nagligad nga kaso nga tuman kabug-at ukon tuman kamag-an sang aksyon pangdisiplina kon ikumparar sa nahimo nga paglapas. Sa pangkabilugan, ang pagpanadlong sa mga ini igaagi lang sa pagtadlong sa ila rekord sa Partido. Sa mga kaso nga daku ang ginbug-at sa nagakadapat nga aksyon pangdisiplina, pwede bag-uhon ang subong nga disposisyon sang imbolbado bastat indi ini magabunga sang mga dislokasyon sa organisasyon kag mga hilikuton. Pwede man nga bag-uhon ang subong nga pusisyon kag disposisyon sang mga kaupod nga nakalapas sa nagligad nga mas mamag-an sangsa sa nagakadapat ang ginbaton nga aksyon pangdisiplina, sa tion nga malala ang nangin paglapas. Sa pagrepaso nga pagahimuon kag sa pagdesisyon kon may mangin epekto sa pusisyon kag disposisyon subong sang mga imbolbado ang resulta sang pagrepaso, lubos nga ikonsiderar ang kadugayon sang panahon nga nagligad na, ang nangin aktwal nga rekord sa panahon tyempo nga ato sang mga imbolbado kag ang mga nangin pagbag-o sa kahimtangan kag mga hilikuton sang Partido. Ang pangunahon nga katuyuan sang pagrepaso amo ang pagdula sa mga bagahe, pagpahugot pa sa paghiliusa sang Partido, kag labi pa nga pagpapagsik sa pag-inisyatiba kag paghulag sang mga katapu sang Partido. Likawan nga magbunga ini sang wala sang kapuslanan nga pag-ukay sa mga nagligad nga bangigay kag sang mga pagbasulay. Pangibabawon ang espiritu sang pagtuon agud makatuon sa nagligad nga mga kasaypanan kag ang paghangpanay.

□

(Nota: Ginsalhin kag ginbalhag sang Sentral nga Prente, Nobyembre 2004.)